

摘藻堂四庫全書薈要

史部

欽定四庫全書薈要卷六千五百二十八 史部

元史卷一百四十九

明翰林學士亞中大夫知制誥兼修國史宋濂等修

列傳第三十六

耶律瑠格

耶律瑠格契丹人仕金為北邊千戶太祖起兵朔方金人疑遼遺民有他志下令遼民一戶以二女真戶夾居防之瑠格不自安歲壬申遁至隆安韓州糾壯士剽掠

其地州發卒追捕瑠格皆擊走之因與伊德合勢募兵數月衆至十餘萬推瑠格為都元帥伊德副之營帳百里威震遼東太祖命阿禪諾延呼塔噶行軍至遼遇之問所從來瑠格對曰我契丹軍也往附大國道阻馬疲故逗遛於此阿禪曰我奉旨討女真適與爾會庸非天乎然爾欲效順何以為信瑠格乃率所部會阿禪於金山刑白馬白牛登高北望折矢以盟阿禪曰吾還奏當以征遼之責屬爾金人遣和碩帥軍六十萬號百萬來

攻瑠格聲言有得瑠格骨一兩者賞金一兩肉一兩者
賞銀亦如之仍襲千戶瑠格度不能敵乃亟馳表聞帝
命阿禪博多歡阿魯達鳴引千騎會瑠格與金兵對陳
于德濟諾爾瑠格以姪安努為先鋒橫衝和碩軍大敗
之以所俘輜重獻帝召阿禪還以克達格爾副瑠格屯
其地衆以遼東未定癸酉三月推瑠格為王立妻約囉
氏為妃以其屬伊實布為郡王布色僧嘉努伊德李嘉
努等為丞相元帥尚書通古珠巴克行元帥府事國號

遼甲戌金遣使青格誘以重祿使降不從青格度其勢不可反臣之金主怒復遣宣撫萬努領軍四十餘萬攻之瑠格逆戰于歸仁縣北河上金兵大潰萬努收散卒奔東京安東同知阿林懼遣使求附于是盡有遼東州郡遂都咸平號為中京金左副元帥伊勒都以兵十萬攻瑠格拒戰敗之乙亥瑠格破東京克特格爾娶萬努妻李仙娥瑠格不直之有隙既而伊實布等勸瑠格稱帝瑠格曰向者吾與阿禪諾延盟願附大蒙古國削平

疆宇倘食其言而自為帝是逆天也逆天者必有大咎
衆人請愈力不獲已稱疾不出潛與其子實沙奉金幣
九十車金銀牌五百至阿勒坦巴圖罕入覲帝曰漢人
先納款者先引見太傅阿哈奏曰劉伯林先納款帝曰
伯林雖先然迫于重圍而來未若瑠格仗義效順也其
先瑠格既見帝大悅謂左右曰凡瑠格所獻白之于天
乃可受遂以白氊陳于前七日而後納諸庫因問舊何
官對曰遼王帝命賜金虎符仍遼王又問戶籍幾何對

曰六十餘萬帝曰可發三千人為質朕遣蒙古三百人往取之汝亦遣人偕往瑠格遣大夫奇努安撫圖格與俱且命詰克特格爾曰汝妻萬努之妻悖法尤甚其拘繫以來克特格爾懼與伊實布等給衆曰瑠格已死遂以衆叛殺所遣三百人惟三人逃歸事聞帝諭瑠格曰爾毋以失衆為憂朕倍此數封汝無吝也草青馬肥資爾甲兵往取家孥丙子奇努金山青格通古等推伊實布僭帝號于澄州國號遼改元天威以瑠格兄都呼為

平章置百官方閱月其元帥青格叛歸于金伊實布為
其下所殺推其丞相竒努監國與其行元帥雅爾分兵
民為左右翼屯開保州闕金蓋州守將衆嘉努引兵攻
敗之瑠格引蒙古軍數千適至得兄都呼并妻約囉氏
戶二千雅爾引敗軍東走瑠格追擊之還渡遼河招撫
懿州廣寧徙居臨潢府竒努走高麗為金山所殺金山
又自稱國王改元天德通古復殺金山而自立哈沙又
殺之亦自立戊寅瑠格引蒙古契丹軍及東夏國元帥

呼圖克兵十萬圍哈沙高麗助兵四十萬克之哈沙自
經死徙其民于西樓自乙亥歲瑠格納款遼東反覆伊
實布僭號七十餘日金山二年通古及哈沙亦僭二年
至己卯春瑠格復定之庚辰瑠格卒年五十六妻約囉
氏入奏會帝征西域皇太弟承制以約囉氏佩虎符權
領其衆者七年丙戌帝還約囉氏攜次子善格特爾格
永安及從子塔塔喇孫壽果努見帝于河西阿勒楚爾
城帝曰健鷹飛不到之地爾婦人乃能來耶賜酒慰勞

甚至約囉氏奏曰瑠格既歿官民乏主長子實沙扈從
有年願以次子善格代之使歸襲爵帝曰實沙今為蒙
古人矣其從朕之征西域也回回圍太子于哈瑪爾城
實沙引千軍救出之身中槩又于布哈塔實干城與回
回格戰傷流矢以是積功為巴圖爾不可遣當令善格
襲其父職約囉氏拜且泣曰實沙者瑠格前妻所出嫡
子也宜立善格者婢子所出若立之是私已而蔑天倫
婢子竊以為不可帝嘆其賢給驛騎四十從征河西賜

河西俘人九口馬九匹白金九錠幣器皆以九計許以
實沙襲爵而留善格塔塔喇壽果努于朝惟遣其季子
永安從約囉氏東歸丁亥帝召實沙謂曰昔女真用兵
爾父起兵自遼東會朕師又能割愛以爾事朕其情貞
懃可尚繼而奸人伊實布等叛人民離散欲食爾父子
之肉者今豈無人乎朕以兄弟視爾父則爾猶吾子爾
父亡矣爾其與吾弟布拉噶台並轄軍馬為第三千戶
實沙受命己丑從太宗征南有功賜馬四百牛六百羊

二百庚寅帝命與薩里台東征收其父遺民移鎮廣寧府行廣寧路都元帥府事自庚寅至丁酉連征高麗東夏萬努國復戶六千有奇戊戌實沙卒年四十六子壽果努襲爵行廣寧路總管軍民萬戶府事易名曰實喇征高麗有功辛亥睿宗以實喇為國宣力者三代命益金更造所佩虎符賜之佐諸王伊克及扎拉台控制高麗己未卒年四十五長子古納嗣中統元年征河西三年征李璫破嶧山以功皆受賞至元六年朝廷併廣寧

于東京去職是歲卒年三十六子特爾格實沙弟善格
賜名孟古岱命從親王昆布哈已丑從攻破天城堡鳳
翔府以功襲克巴圖爾壬辰引兵三千渡河會大軍平
金後伐宋拔光州秦陽由千戶遷廣寧尹至元元年卒
年五十二子天祐襲廣寧千戶改廣寧縣尹

劉伯林

劉伯林濟南人好任俠善騎射金末為威寧防城千戶
壬申歲太祖圍威寧伯林知不能敵乃縋城詣軍門請

降太祖許之遣圖魯格等與偕入城遂以城降帝問伯
林在金國為何官對曰都提控即以元職受之命選士
卒為一軍與太傅耶律托輝同征討招降山後諸州太
祖北還伯林屯天成遇金兵前後數十戰進攻西京錄
其功賜金虎符以本職充西京留守兼兵馬副元帥癸
酉從征山東攻梁門遂城下之乙亥同國王穆呼哩攻
破燕京丁丑復從大軍攻下山東諸州穆呼哩上其功
賜名馬二十匹錦衣一襲戊寅同攻下太原平陽己卯

破潞絳及火山聞喜諸州縣時論欲徙聞喜民實天成
伯林以北地喪亂人艱于食力爭而止之部曲所獲俘
虜萬計悉縱之在威寧十餘年務農積穀與民休息鄰
境凋瘵而威寧獨為樂土嘗曰吾聞活千人者後必封
吾之所活何啻萬餘人子孫必有興者乎辛巳以疾卒
年七十二累贈太師封秦國公諡忠順子黑馬

黑馬名焜字孟方始生時家有白馬產黑駒故以為小
字後遂以小字行驍勇有志略年幾弱冠隨父征伐大

小數百戰出入行陣略無懼色嘗獨行遇金兵圍本部
十三人即奮劍入圍手殺金兵數人十三人皆得脫歲
壬午襲父職為萬戶佩虎符兼都元帥癸未從國王穆
呼哩攻鳳翔不克回屯絳州又從博囉攻西夏唐古甲
申從阿禪諾延攻破東平大名乙酉金降將武仙據真
定以叛從博囉討之破真定武仙遁去金將呼齊呼以
兵四十萬復出山後諸州黑馬逆戰隘胡嶺大破之斬
呼齊呼歲己丑太宗即位始立三萬戶以黑馬為首重

喜史天澤次之授金虎符充管扼平陽宣德等路管軍
萬戶仍僉太傅府事總管漢軍從征回回河西諸國及
破鳳翔西河沔州諸城堡庚寅睿宗入自大散關假道
于宋以伐金命黑馬先由興元金房東下至三峰山遇
金大將哈達與戰大破之虜哈達斬首數萬級乘勝攻
破香山寨及鈞州賜西錦良馬貂鼠衣以旌其功會增立
七萬戶仍以黑馬為首重喜史天澤嚴實等次之癸巳
又從破南京賜錦衣玉帶甲午從破蔡州滅金乙未同

都元帥塔海甘布征西川辛丑改授都總管萬戶統西
京河東陝西諸軍萬戶瓜爾佳孟古岱田雄等並聽節
制入覲帝慰勞之賜銀鼠三百為濟遜衣尋命巡撫天
下察民利病應州郭志全反脇從誑誤者五百餘人有
司議盡戮之黑馬止誅為首者數人餘悉從輕典歲癸
丑從憲宗至六盤山商州與宋接境數為所侵命黑馬
守之宋人斂兵不敢犯丁巳入覲請立成都以圖全蜀
帝從之成都立就命管領新舊軍民小大諸務賜號伊

克托里中統元年庶希憲商挺宣撫川陝時密喇卜和卓握重兵居成都希憲與挺慮其為變以黑馬有膽智使乘驛矯詔誅戮之其子訴于朝世祖諭之曰茲朕命也其勿復言三年命蕙成都路軍民經略使瀘州被圍黑馬已屬疾猶親督轉輸不輟左右諫其少休黑馬曰國事方急以此死無憾遂卒年六十三累贈太傅封秦國公諡忠惠子十二人元振元禮顯

元振字仲舉黑馬長子也隨父入蜀立成都會商鄧間

有警命黑馬往鎮商鄧以元振攝萬戶時年方二十既蒞事號令嚴明賞罰不妄麾下宿將皆敬服之憲宗伐宋駐蹕釣魚山以元振與納琳為先鋒中統元年世祖即位廉希憲高挺奏以為成都經略使總管萬戶宋瀘州守將劉整密送款求降黑馬遣元振往受之諸將皆曰劉整無故而降不可信也元振曰宋權臣當國賞罰無章有功者往往以計除之是以將士離心且整本非南人而居瀘南重地事勢與李全何異整此舉無可疑

者遂行黑馬戒之曰劉整宋之名將瀘乃蜀之衝要今
整遽以瀘降情偽不可知汝無為一身慮事成則為國
家之利不成則當效死乃其分也元振至瀘整開門出
迎元振棄衆而先下馬與整相見示以不疑明日請入
城元振釋戎服從數騎與整聯轡而入飲燕至醉整心
服焉獻金六千兩男女五百人元振以金分賜將士而
歸還其男女宋瀘州主帥俞興率兵圍瀘州晝夜急攻
自正月至五月城幾陷左右勸元振曰事勢如此宜思

變通整本非吾人與俱死無益也元振曰人以誠歸我
既受其降豈可以急而棄之且瀘之得失關國家利害
吾有死而已食將盡殺所乘馬犒將士募善游者齎蠟
書至成都求援又權造金銀牌分賞有功未幾援兵至
元振與整出城合擊興兵大敗之斬其都統一人興退
走捷聞且自陳擅造金銀牌罪帝嘉其通于權變賜錦
衣一襲白金五百兩入朝又賜黃金五十兩弓矢鞍轡
黑馬卒元振居喪起授成都軍民經略使至元七年時

議以勳舊之家事權太重宜稍裁抑遂降為成都副萬戶十一年命兼潼川路副招討使十二年卒年五十一子緯數從父行軍元振卒緯襲職佩虎符為萬戶守潼川創立遂寧諸處山寨從圍釣魚山數戰有功攻合州授潼川路副招討遷副都元帥復授管軍萬戶遷同知四川西道宣慰司事入朝進四川西道宣慰使拜陝西行省參知政事卒

元禮黑馬第五子也性渾厚有謀常從父在軍中歲甲

寅授金符為京兆路鄂囉萬戶中統四年遷興元成都
等路兵馬左副元帥至元元年遷潼川路漢軍都元帥
二年九月宋制置夏貴率軍五萬犯潼川元禮所領纔
數千衆寡不敵諸將登城望貴軍有懼色元禮曰料敵
制勝在智不在力乃出戰屢破之復大戰蓬溪自寅至
未勝負不決激厲將士曰此去城百里為敵所乘則城
不可得入潼川非國家有矣丈夫當以死戰取功名時
不可失也即持長刃大呼突入陣所向披靡將士咸奮

無不一當百大敗貴兵斬首萬餘級生擒千餘人捷奏
賜錦衣二襲白金三錠名馬一匹金鞍轡弓矢召入朝
命復還潼川立蓬溪寨元禮又奏嘉定去成都三百六
十里其間舊有眉州城可修復之屯兵以扼嘉定往來
之路世祖從之四年命平章趙寶臣往視可否或以為
眉州荒廢已久立之無關利害徒費財力元禮力爭之
寶臣是其言遂興役七日而畢宋人駭其速元禮鎮守
眉州五年召入朝乞解官養母從之九年起授懷遠大

將軍延安路總管卒

郭寶玉

郭寶玉字玉臣華州鄭縣人唐中書令子儀之裔也通天文兵法善騎射金末封汾陽郡公兼明安引軍屯定州歲庚午童謠曰搖搖吾吾至河南拜闕氏既而太白經天寶玉嘆曰北軍南汴梁即降天改姓矣金人以通竒思忠布薩揆行中書省領兵築烏沙堡會太師穆呼哩軍忽至敗其兵三十餘萬思忠等走寶玉舉軍降穆

呼哩引見太祖問取中原之策寶玉對曰中原勢大不可忽也西南諸蕃勇悍可用宜先取之藉以圖金必得志焉又言建國之初宜頒新令帝從之于是頒條畫五章如出軍不得妄殺刑獄惟重罪處死其餘雜犯量情笞決軍戶蒙古色目人每丁起一軍漢人有田四頃人三丁者僉一軍年十五以上成丁六十破老站戶與軍戶同民匠限地一頃僧道無益于國有損于民者悉行禁止之類皆寶玉所陳也帝將伐西蕃患其城多依山

險問寶玉攻取之策對曰使其城在天上則不可取如不在天上至則取矣帝壯之授綽滿都鎮撫癸酉從穆呼哩取永清破高州降北京龍山復帥綽滿從錦州出燕南破太原平陽諸州縣甲戌從帝討契丹遺族厯庫珠克國鄂爾多等城破其兵三十餘萬寶玉胸中流矢帝命剖牛腹置其中少頃乃蘇尋復戰收巴實伯哩丕實南等城次呼展河西人列兩陣迎拒戰方酣寶玉望其衆疾呼曰西陣走矣其兵果走追殺幾盡進兵下塔

實干城次阿穆爾河敵築十餘壘陳船河中風濤暴起
寶玉令發火箭射其船一時延燒乘勝直前破護岸兵
五萬斬大將纒哩遂屠諸壘收瑪勒四城辛巳庫奇頁
國咸錫蘇勒坦汗破奈曼國引兵據塔實干聞帝至棄
城南走入鐵門屯大雪山寶玉追之奔印度帝駐大雪
山前時谷中雪深二丈寶玉請封山川神壬午三月封
崑崙山為玄極王大鹽池為惠濟王從括伯蘇布特二
先鋒收契丹渤海等諸國有功累遷斷事官卒于賀蘭

山子德海德山德山以萬戶破陝州攻潼關卒

德海字大洋資貌奇偉亦通天文兵法金末為穆昆擊
宋將彭義斌于山東敗之知父寶玉北降遁入太行山
大軍至乃出降為綽滿彈壓從先鋒括伯西征渡庫色
勒伯頁海攻鐵山衣幟與敵軍不辨乃焚蒿為號煙焰
漫野敵軍動乘之斬首三萬級踰雪嶺西北萬里進軍
次達哩國悉平之乙酉還至崢山吐蕃帥紐掄回紇帥
阿必鼎反復斬破之戊子春從元帥庫庫楚游騎入關

中金人閉關拒守德海引驍騎五百斬關入殺守者三百人直擣凌風渡寨後兵不至引還己丑秋破南山八十三寨陝西平德海導大將庫哩頁納巴圖假道漢中歷荆襄而東與金武仙軍十萬遇于白河德海提孤軍轉戰仙敗走斬首二萬餘級復破金伊喇聶赫軍于鄧冬十一月至鈞州辛卯春正月睿宗軍由洛陽來會于三峯山金人溝地立軍圍之睿宗令軍中祈雪又燒羊脾骨卜得吉兆夜大雪深三尺溝中軍僵立刀槩凍不

能舉我軍衝圍而出金人死者三十餘萬其帥完顏哈達伊喇布哈走匿浮圖上德海命掘浮圖基出其柱而焚之完顏色埒默單騎遁還洛陽又破金將喀齊喀兵于中牟完顏色埒默復帥軍十萬來拒戰于鄭先登破之殺其都尉左崇以功遷右監軍壬辰正月破金師于黃龍岡癸巳取申唐二州甲午河南復叛德海往討砲傷足以疾歸卒先是太宗詔大臣呼圖克等試天下僧尼道士選精通經文者千人有能工藝者則命小通事

哈準等領之餘皆為民又詔天下置學廩育人材立科目選之入仕皆從德海之請也子侃

侃字仲和幼為丞相史天澤所器重留于家而教養之弱冠為百戶鷲勇有謀略壬辰金將布色復取衛州侃拒之破其兵四萬于新衛州遂渡河襲金主至歸德敗其兵于闕伯臺即從蘇布特攻汴西門金元帥崔立降以功授總把從天澤屯太康復以下德安功為千戶壬子送兵仗至和林改綽滿諾延從宗王錫里庫西征癸

丑至穆錫其國塹道置毒水中侃破其兵五萬下一百二十八城斬其將呼圖克岱爾烏珠蘇勒坦蘇勒坦華言王也丙辰至奇塔卜其城在檐寒山上懸梯上下守以精兵乃築夾城圍之不克侃架砲攻之守將和卓納色爾開門降錫里庫遣侃往說烏爾古納蘇勒坦來降其父阿里據西城侃攻破之走據東城復攻破殺之丁巳正月至烏喇爾城伏兵下令聞鉦聲則起敵果來伏發盡殺之哈雅蘇勒坦降西至阿勒鼎破游兵三萬密

藏達爾蘇勒坦降至克實密爾部呼哩蘇勒坦降西戎
大國也地方八千里父子相傳四十二世勝兵數千萬
侃兵至破其兵七萬屠西城破其東城東城殿宇皆構
以沈檀木舉火焚之香聞百里得七十二絃琵琶五尺
珊瑚燈檠兩城間有大河侃預造浮梁以防其遁城破
哈里巴蘇勒坦登舟見河有浮梁扼之自縛詣軍門降
其將卓克達爾遁去侃追之至暮諸將欲頓舍不聽又
行十餘里乃止夜暴雨先所欲舍處水深數尺明日獲

卓克達爾斬之拔三百餘城又西行三千里至達巴其將周齊致書請降左右以周齊之請為信易之不為備侃曰欺敵者亡軍機多詐若中彼計恥莫大焉乃嚴備以待周齊果來邀我師侃與戰大敗之巴爾蘇勒坦降下城一百八十五又西行四十里至密實勒會日暮已休復驅兵起留數病卒西行十餘里頓軍下令軍中銜枚傳箭敵不知潛兵夜來襲殺病卒克納蘇勒坦大驚曰東天將軍神人也遂降戊午錫里庫命侃西渡海收

布拉克喻以禍福烏都蘇勒坦曰吾昨夢神人乃將軍也即來降師還西南至實喇斯敵人來拒侃直出掠陣一鼓敗之密實肯阿達必蘇勒坦降至布圖侃以奇兵擊敗之雅雅蘇勒坦降己未破烏林游兵四萬阿必鼎蘇勒坦懼來降得城一百二十西南至奇勒揚和達瑪鼎蘇勒坦降西域平侃以捷告至釣魚山會憲宗崩乃還鄧開屯田立保障世祖即位侃上疏陳建國號築都城立省臺興學校等二十五事及平宋之策其略曰

宋據東南以吳越為家其要地則荆襄而已今日之計當先取襄陽既克襄陽彼揚廬諸城彈丸地耳置之勿顧而直趨臨安疾雷不及掩耳江淮巴蜀不攻自平後皆如其策中統二年擢江漢大都督府理問官三年二月益都李壇及徐州總管李誥格俱反宋夏貴復來犯邊史天澤薦侃召入見世祖問計所出曰羣盜竊發猶柙中虎內無資糧外無救援築城環之坐待其困計日可擒也帝然之賜尚衣弓矢馳至徐斬誥格夏貴焚廬

舍徙軍民南去侃追貴過宿遷縣奪軍民萬餘人而還
賜金符為徐邳二州總管誥格之弟里瑪復與夏貴以
兵三萬來擾邊境侃出戰斬首千餘級奪戰船二百至
元二年有言當解史天澤兵權者天澤遂遷他官侃亦
調同知滕州三年侃上言宋人羈留我使宜興師問罪
淮北可立屯田三百六十所每屯置牛三百六十具計
一屯所出足供軍旅一日之需四年徙高唐令兼治夏
津武城等五縣五年邑人吳乞兒濟南道士胡玉反討

平之七年改白馬令僧臧羅漢與彰德趙當驢反又平之帝以侃習于軍務擢為萬戶從軍下襄陽由陽羅上流渡江江南平遷知寧海州居一年卒侃行軍有紀律野爨露宿雖風雨不入民舍所至興學課農吏民畏服子秉仁秉義

石天應

石天應字瑞之興中永德人善騎射豪爽不羈頗知讀書鄉里人多歸之太祖時太師國王穆呼哩南下天應

率衆迎謁軍門穆呼哩即承制授興中府尹兵馬都提
控俾從南征天應造戰攻之具臨機應變捷出如神以
功拜龍虎衛上將軍元帥右監軍戍燕天應旌旗色用
黑人目之曰黑軍屢從穆呼哩大小二百餘戰常以身
先士卒累功遷右副元帥辛巳秋八月從穆呼哩征陝
右假道西夏自東勝濟河南攻葭州拔之天應因說太
師曰西戎雖降實未可信此州當金夏之衝居人健勇
倉庫豐實加以長河為限脫為敵軍所梗緩急非便宜

命將守之多造舟楫以備不虞此萬世計也穆呼哩然
之表授金紫光祿大夫陝西河東路行臺兵馬都元帥
以勁兵五千留守葭蘆遂造舟楫建浮橋諸將多言水
漲波惡恐勞費無功天應下令曰有阻吾事者割其舌
橋成諸將悅服先時葭守王公佐收合餘燼攻函谷關
將圖復故地及見橋成遂潰去于是分兵四出悉定葭
綏之地一日謁穆呼哩于汾水東穆呼哩諭以進取之
策天應還鎮召將佐謂曰吾累卿等留屯于此今聞河

東西皆平川廣野可以駐軍規取關陝諸君以為何如
或諫曰河中雖用武之地南有潼關西有京兆皆金軍
所屯且民新附其心未一守之恐貽噬臍之悔天應曰
葭州正通廊延今廊已平延不孤立若發國書令夏人
取之猶掌中物耳且國家之急本在河南此州路險地
僻轉餉甚難河中雖迫于二鎮實用武立功之地北接
汾晉西連同華地五千餘里戶數十萬若起漕運以通
餽餉則關內可尅期而定關內既定長河以南在吾目

中矣吾年垂六十老耄將至一旦臥病牀第聞後生輩
立功名死不瞑目矣男兒要當死戰陣以報國是吾志
也秋九月遂移軍河中既而金軍果潛入中條襲河中
天應知之先遣驍將吳澤伏兵要路澤勇而嗜酒是夕
方醉臥林中金兵由間道已直抵城下時兵燼後守具
未完新附者爭絕而去敵乘隙入天應見火舉知敵已
入奮身角戰左右從者四十餘騎皆曰吳澤誤我或勸
西渡河天應曰先時人諫我南遷吾違衆而來此事急

棄去是不武也縱太師不罪我何面目以見同列乎今日惟死而已汝等勉之少頃敵兵四合天應飲血力戰至日午死之穆呼哩聞而痛惜焉子煥中知興中府事執中行軍千戶受中興中府相副官初天應死事時弟天禹子佐中在軍中伺敵少懈倒抽其斧反斫之突城而出趨穆呼哩行營求得蒙古軍數千回與敵戰敗之穆呼哩嘉其功奏授金符行元帥尋詔將官各就本城授興中府千戶子安琬襲職佩金符從征大理討李璫

皆有功十三年隆興之分寧叛行省檄安琬討之賊背
山而陣安琬引兵出陣後賊驚潰退而拒守安琬揮兵
直抵壘門賊揚言曰願少容行伍而戰死且不憾安琬
從之賊果出陣安琬突陣而人大呼曰吾止誅賊首庸
卒非我敵也手刃中賊背生擒之累功至右衛親軍副
都指揮使進階懷遠大將軍賜金虎符復授大同等處
萬戶領江左新附卒萬人屯田紅城大德三年李萬戶
當戍和寧親老且病安琬請代其行及還以病卒子居

金史卷之九十九
卷一百四十九
謙襲職後改忠翊侍衛親軍都指揮使

伊喇聶呼

伊喇聶呼契丹人也幼有大志膂力過人沈毅多謀略
遼亡金以為參議留守等官皆辭不受聞太祖舉兵私
語所親曰為國復仇此其時也率其黨百餘人詣軍門
獻十策帝召見與語奇之賜名賽音筆且齊又問爾生
何地對曰霸州因號為霸州元帥乙亥拜兵馬都元帥
佐太師穆呼哩取北京下高利興松義錦等二十六城

破五十四寨平利州賊劉四祿及錦州賊張致兵勢方熾且盜名號穆呼哩命聶呼與大將烏頁爾昭烏呼合兵討之致拒戰聶呼出奇兵掩擊斬致穆呼哩第功以聞遷龍虎衛上將軍兵馬都提控元帥繼取遼東西廣寧金復海蓋等十五城興州監州綽爾反復與烏頁爾討平之帝遣使者詔之曰自汝効順戰功日多今錫汝金虎符居則理民有事則將其勿替朕意戊寅從攻東平辛巳從攻延安壬午從圍鳳翔先登手殺數十人左

臂中流矢創甚裏創進攻丹延穆呼哩止之對曰創未
至死敢自愛耶穆呼哩壯之與所乘白馬明日介其馬
飭以朱纓簡驍衛七十人與金兵戰穆呼哩乘高見其
馳突萬衆中曰此霸州元帥也諸軍繼進金兵敗走丹
延十餘城皆降遷軍民都達嚕噶齊都提控元帥兼興
勝府尹癸未從帝征河西取甘合辛蛇等州師還復從
穆呼哩攻益都下萊膠淄等三十二城戊子得疾歸高
州卒贈推忠宣力保德功臣太尉開府儀同三司上柱

國追封興國公謚武毅子邁努

邁努早從父習戰陣初入見太祖問曰汝年小能襲父爵乎對曰臣年雖小國法不小帝異其對顧左右曰此兒甚肖乃父以為高州等處達嚕嚕齊兼征行萬戶庚寅命攻高麗花涼城監軍張翼劉霸都殞于敵邁努怒曰兩將陷賊義不獨生趨出戰破之誅首將撫安其民進攻開州州將金實默逆戰擒之城中人出童男女及金玉器以獻卻不受遂下龍宣雲秦等十四城癸巳從

諸王阿齊台征女直萬努部有功未幾召還興州趙祚
反土豪楊買驢等附之帝命從親王察罕台帥師討之
斬賊將董蠻等圍買驢于險樹寨三月不能下邁努令
健卒劉五兒即寨北小徑上大樹以繩潛引百人登寨
直前却之買驢投崖死餘黨悉平太宗即位錄功賜金
鞍良馬乙未從征高麗入王京取其西京而還賜金鎖
甲加鎮國上將軍征東大元帥佩金符復命出師高麗
將行以疾卒年四十贈推誠效義功臣榮祿大夫平章

政事追封興國公謚顯懿子元臣

元臣別名哈喇哈斯年十六入宿衛應對進止有度世祖謂丞相和爾果斯曰此勳臣子非凡菴也以為集賽筆且齊襲千戶將其父軍從伐宋攻淮西戍清口取瓜洲下通泰累有功至元十二年從丞相巴延平宋進階武義將軍中衛親軍總管佩金虎符十四年珠爾噶岱叛圍應昌府時皇女魯國公主在圍中元臣以所部軍馳擊珠爾噶岱敗走追至魚兒濼擒之公主賜賚甚厚

奏請暫留元臣鎮應昌以安反側居一歲召至京師遷
明威將軍後衛親軍副都指揮使還鎮應昌又三年召
還加昭勇大將軍十九年帝以所籍入權臣家婦賜之
元臣辭曰臣家世清素不敢自污帝嘉歎不已二十二
年進昭毅大將軍同僉江淮行樞密院事行院罷歸高
州帝親征納延元臣率家僮五十人見行在所願效前
驅八年移僉湖廣行樞密院時溪洞施容等州蠻獠作
亂元臣親入其境喻以禍福賊首魯萬丑降三十年卒

于官贈安遠功臣龍虎衛上將軍同知樞密院事追封
興國公諡忠靖子迪中奉大夫湖廣宣慰使都元帥

耶律托輝

圖們岱爾

孟古岱

耶律托輝契丹人世居桓州太祖時率衆來歸大軍入
金境為嚮導獲牧馬甚衆後侍太祖同飲班珠爾河水
從伐金大破呼齊呼軍又從穆呼哩收山東河北有功
拜太傅總領伊克諾延封濮國公賜虎符銀印歲給錦
幣三百六十疋統萬戶扎拉爾劉黑馬史天澤伐金卒

于西河州子珠格嗣仍統劉黑馬等七萬戶與都元帥
塔海甘布同征四川卒于軍子保通嗣以疾不任事珠
格弟邁珠嗣而以保通充隨路新軍總管邁珠言於憲
宗曰今欲略定西川下流諸城當先定成都以為根本
臣請往相其地帝從之遂率諸軍往成都攻嘉定未下
而卒子和爾台嗣總諸軍立成都府卒于軍以兄百嘉
努嗣自珠格至百嘉努並襲太傅總領伊克諾延圖們
岱爾者百嘉努之弟和爾台之兄也常留中宿衛後百

嘉努解兵柄為他官乃授成都管軍萬戶代將其軍至元十一年從呼敦攻嘉定修平康寨以守之十二年從汪特格攻九頂山破之殺都統一人嘉定降從呼敦徇下瀘敘諸城圍重慶守合江口又以舟師塞龍門濠遏其援兵十三年瀘州叛從汪特格攻之重慶遣兵援瀘邀擊破之獲七十人瀘堅守不下圖們岱爾夜率兵攻奪水城以進黎明先登入瀘城克之斬其將王世昌李都統復從布哈圍重慶守將張珏搏戰敗之城下重慶

降賜虎符授夔路招討使遷四川東道宣慰使仍兼夔
路招討改同僉四川等處行樞密院事遷四川等處行
中書省左丞尚書省立改行尚書省左丞進右丞卒孟
古岱保通之子也世祖時賜金符襲父職為隨路新軍
總管統領山西兩路新軍從行省伊蘇岱爾征蜀及思
播建都諸蠻夷有功陞萬戶從攻羅必甸至雲南詔以
其衆入緬迎雲南王金齒白衣荅奔諸蠻往往伏險要
為備孟古岱奮擊破之凡十餘戰至緬境開金齒道奉

王以還遷副都元帥從諸王阿勒台征交趾至白鶴江
與交趾偽昭文王戰奪戰艦八十七艘又從雲南王攻
羅必甸破之二十九年入覲成宗即位授烏撒烏蒙等
處宣慰使兼管軍萬戶遷大理金齒等處宣慰使都元
帥六年烏撒羅羅斯叛雲南行省命率師討平之事聞
賜鈔三千貫銀五十兩金鞍轡及弓矢以旌其功九年
討普安羅雄州叛賊阿填擒殺之進驃騎衛上將軍遙
授雲南諸路行中書省左丞行大理金齒等處宣慰使

都元帥卒于軍至大四年贈龍虎衛上將軍平章政事
仍追封濮國公諡威愍子和尼齊襲萬戶

王珣

子榮祖

王珣字君實本姓耶律氏世為遼大族金正隆末契丹
斡罕叛祖成從母氏避難遼西更姓王氏遂為義州開
義人父伯俊伯父伯京無子以珣為後珣武力絕人善
騎射尤長於擊鞠年三十餘遇道士謂珣曰君之相甚
奇它日因一青馬而貴珣未之信居歲餘有客以青馬

來鬻珣私喜曰道士之言或驗乎乃倍價買之後乘以
戰其進退周旋無不如意又嘗行凌水濱得一古刀其
背銘曰舉無不克動必成功常佩之每有警必先鳴故
所向皆捷初河朔兵動豪強各擁衆據地珣慨然曰世
故如此大丈夫當自振拔否則為人所制乃召諸鄉人
諭以保親族之計衆從之推珣為長旬月之間招集遺
民至十餘萬歲乙亥太師穆呼哩略地奚雲珣率吏民
出迎承制以珣為元帥兼領義川二州事丙子春張致

僭號錦州陰結開義楊伯傑等來掠義州珣出戰伯傑引去會致兄子以千騎來衝珣選十八騎突其前復令左右犄角之一卒以鎗刺珣珣揮刀殺之其衆潰走獲其馬幾盡時興中亦叛穆呼哩圍之召珣以全軍來會致窺覘其虛夜襲之家人皆遇害及興中平珣無所歸穆呼哩留之興中遣其子榮祖馳奏其事帝諭之曰汝父子宣力我家不意為張致所襲歸語汝父善撫其軍自今以往當忍恥蓄銳俟逆黨平彼之族屬城邑人民

一以付汝吾不吝也仍免徭賦五年使汝父子世為大
官珣以穆呼哩兵復開義擒伯傑等殺之進攻錦州致
部將高益縛致妻子及其黨千餘人以獻穆呼哩悉以
付珣珣但誅致家其餘皆釋之始還義州丁丑入朝帝
嘉其功賜金虎符加金紫光祿大夫兵馬都元帥鎮遼
東便宜行事兼義川等州節度使珣貌黑人呼為哈刺
元帥哈喇中國言黑也從穆呼哩兵略山東至滿城令
還鎮戒之曰彼新附之民恃山海之險反覆不常非盡

坑之終必為變對曰國朝經畧中夏宜以恩信結人若
降者則殺後寧復有至者乎遂還以子榮祖代領其衆
甲申春正月卒年四十八珣為政簡易賞罰明信誅強
撫弱毫髮無徇子四人榮祖襲

榮祖字敬先珣長子也性沈厚語音如鐘勇力絕人珣
初附於穆呼哩以榮祖為質稍見任用珣卒襲榮祿大
夫崇義軍節度使義州管內觀察使從嗣國王博囉入
朝帝聞其勇選力士三人迭與之搏皆應手而倒欲留

置宿衛會金平章政事葛布格行省於遼東咸平路宣撫使布希萬努僭號於開元遂命榮祖還副薩里台進討之拔蓋州宣城等十餘城葛布格走死金帥郭琛完顏伊拉瑪趙遵李高努等猶據石城復攻拔之伊拉瑪戰死遵與高努出降虜生口千餘薩里台欲散於麾下榮祖屢請皆放為民方城未下時榮祖遣步卒賈實穴其城城崩被壓衆謂已死弗顧也榮祖曰士忘身死國安忍棄去發石取之猶生一軍感激樂為效死有言義

人懷反側者薩里台將屠之榮祖馳驛奏辨事乃止已丑授北京等路征行萬戶換金虎符伐高麗圍其王京高麗王力屈遣其兄淮安公奉表納貢進討萬努擒之趙祁以興州叛從諸王阿齊台平之祁黨猶剽掠景劄間復從大將唐古特討之將行榮祖曰承詔討逆人耳豈可戮及無辜宜惟抗我者誅大將然之由是免死者衆再從征高麗破十餘城高麗遣子縉入質帝賜錦衣旌其功從諸王雅勒呼略地三韓降天龍諸倭皆禁暴

掠民悅服之破五里山城請於主將全其民遂下獲子
城竹林寨苦苦數島帝嘉其功賜以金幣官其子興干
戶仍賞其部曲移鎮高麗平壤帝遣使諭之曰彼小國
負險自守釜中之魚非久自死緩急可否卿當熟思榮
祖乃募民屯戍闢地千里盡得諸島嶼城壘高麗遣其
世子僉出降遂以僉入朝中統元年夏詔榮祖詣闕帝
撫慰之曰卿父子勤勞於國誠節如一進沿邊招討使
兼北京等路征行萬戶賜寶鞍弓矢還鎮以病卒年六

十五子十三人顯者六人通興中府尹秦權知義錦川
等州總管興征東千戶遇襄陽路管軍萬戶達東京五
路征行萬戶廷鎮國上將軍中衛親軍都指揮使璪江
西湖東道提刑按察使

元史卷一百四十九

元史卷一百四十九考證

郭寶玉傳破其兵三十餘萬 案三十餘萬永樂大曲
本作二十餘萬與此小異



總校官編修臣吳紹深

欽定四庫全書薈要

史部

元史卷二百五十二

至二

詳校官編修臣王天祿



欽定四庫全書蒼要卷六十五百二十九 史部

元史卷一百五十

明翰林學士亞中大夫知制誥兼修國史宋濂等修

傳第三十七

舒穆魯額森

舒穆魯額森遼人也其先嘗從蕭后舉族入突厥及后還而族留至遼為舒魯氏號稱后族遼亡改舒魯氏為舒穆魯氏祖格呼勒誓不食金祿率部落遠徙年九十



夜得疾命家人候日出則以報及旦沐浴拜日而卒父
推勒博奇爾亦不仕有子五人額森其仲子也年十歲
從其父問宗國之所以亡即大憤曰兒能復之及長勇
力過人善騎射多智畧豪服諸部金人聞其名徵為奚
部長即讓其兄實特訥曰兄姑受之為保宗族計遂深
自藏匿居北野山射狐鼠而食聞太祖起朔方匹馬來
歸首言東京為金開基之地蕩其根本中原可傳檄而
定也太祖悅命從太師國王穆呼哩取東京師過臨潢

次高州穆呼哩令額森率千騎為先鋒額森曰兵貴奇
勝何以多為諜知金人新易東京留守將至額森獨與
數騎邀而殺之懷其所受誥命至東京謂守門者曰我
新留守也入據府中問吏列兵於城何謂吏以邊備對
額森曰吾自朝廷來中外晏然柰何欲陳兵以動搖人
心乎即命撤守備曰寇至在我無勞爾輩是夜下令易
置其將佐部伍三日穆呼哩至入東京不費一矢得地
數千里戶十萬八千兵十萬資糧器械山積降守臣音

達瑄等四十七人定城邑三十二金人喪其根本之地始議遷河南歲乙亥移師圍北京城久不下及城破將屠之額森曰王師拯人水火彼既降而復屠之則未下者人將死守天下何時定乎因以上聞赦之授御史大夫領北京達嚕噶齊時石天應與豪酋數十據興中府額森分兵降之奏以為興中尹又命額森副多果朗實里巴監張鯨等軍征燕南未下州郡至平州鯨稱疾不進額森執鯨送行在所帝責之曰朕何負汝鯨對曰臣

實病非敢叛帝曰今呼汝弟致為執當活汝鯨諾而宵
遁額森追戮之致已殺使者應其兄矣致既伏誅額森
籍其私養敢死之士萬二千人號黑軍者上于朝賜虎
符進上將軍以御史大夫提控諸路元帥府事舉遼水
之西灤水之東悉以付之後從國王穆呼哩攻蠡州北
城先登中石死時年四十一子四人曰扎拉曰錫錫曰
博囉曰喀爾扎拉善射襲御史大夫領黑軍戊寅從穆
呼哩攻平陽太原隰吉岢嵐關西諸郡下之遂攻益都

久不下及降衆欲屠其城扎拉曰殺降不祥且得空城
將安用之由是遂免己卯詔以黑軍分屯真定固安太
原平陽隰吉岢嵐諸郡及南征盡以黑軍為前列敗金
將拜姓官努于河渡河再戰盡殺之長驅破汴京入自
仁和門收圖籍而還帝悉以諸軍俘獲賜黑軍癸巳從
國王塔斯征金帥宣撫萬努於遼東之南京先登衆軍
乘之而進遂克之王解錦衣以賜辛丑太宗嘉其功授
真定北京兩路達魯噶齊癸巳卒于柳城年四十四子

庫嚕默襲職中統三年從征李璫中流矢卒子良輔襲
黑軍總管至元十七年以功累陞昭毅大將軍沿海副
都元帥二十一年改沿海上副萬戶大德十一年告老
子繼祖襲萬戶錫錫之子都噶攻樊城戰死實特訥後
亦棄金官來歸為巴實伯里達嚕噶齊卒其孫伊拉瑪
丹仕至遼陽省左丞伊拉瑪丹之子桑齊為湖廣行省
平章政事

何伯祥

子瑋

何伯祥易州易縣人幼從軍于金從張柔來歸太祖定

河朔惟保定王子昌信安張進堅守不下子昌金驍將也柔命伯祥取之兵逼其地子昌出走追及之伯祥執槍馳馬子昌反射之中手而貫槍伯祥拔矢棄槍策馬直前徒手搏之擒子昌進聞之亦遁去伯祥遂攻西山諸寨悉平之後攻汴梁拔洛陽圍歸德破蔡州論功居多授易州等處軍民總管丁酉從主帥察罕伐宋伯祥拔三十餘柵獲戰艦千餘艘又破芭蕉望鄉大洪張家

等寨俘獲甚衆器械山積察罕以其功聞賜錦衣金甲
壬子諸軍入宋境察罕自他道遽還諸軍倉皇失措伯
祥曰此必為敵所遏不若出其不意而遂深入其地彼
不我測乃可出也遂率兵突戰直抵司空寨疏布營壘
陵高伐木為攻取勢既夜命為五營營火十炬伏精銳
于營側險要之地天將明令士卒速行而鳴鼓其後宋
兵果來追伏發驚駭潰去追擊大破之轉戰百餘里他
軍不能歸者皆賴以出帝聞之賜金二百兩世祖南伐

伯祥參預軍事多所獻納卒于軍贈儀同三司太保上柱國追封易國公諡武昌子瑋

瑋始襲父職知易州兄行軍千戶卒瑋復襲之鎮亳州從圍襄樊宋將夏貴率舟師來救瑋時建營於城東北當其衝貴兵縱火焚北關遂進逼瑋萬戶托音布哈等呼瑋入城瑋曰建功立業此其時也何避焉乃率其衆誓以死戰開營門以身先之貴敗走至元十一年丞相巴延受命伐宋辟瑋為帳前都鎮撫師次陽羅堡夏貴

率戰艦列江上下瑋從元帥阿珠率衆先渡諸軍繼之
貴復敗走宋丞相賈似道率舟師拒于丁家洲瑋將勇
敢士出戰奪舟千餘艘似道遁去授武德將軍管軍總
管佩金虎符宋既平進懷遠大將軍太平路軍民達魯
噶齊俄陞昭勇大將軍行戶部尚書兩淮都轉運使至
元十八年擢參議中書省事二十年擢為江浙按察使
二十二年改大名路總管二十八年遷湖南宣慰使三
十一年拜中書參知政事時宰執凡十一人瑋曰古者

一相專任賢也今宰執員多政出多門轉相疑忌請損之不從遂乞代大德四年授侍御史以母病辭七年授御史中丞陳當世要務十條成宗嘉納之京師孔子廟成璋言唐虞三代國都閭巷莫不有學今孔廟既成宜建國學於側從之賽音諤德齊巴圖果勒等還自貶所復相璋言姦黨不可復用宜選正人以居廟堂帝然之監察御史郭章劾郎中哈喇哈斯受贓具服而哈喇哈斯密結權要以枉問誣章璋率臺臣入奏辨論剴切章

遂得釋九年冬將有事于南郊議配享瑋曰嚴父配天萬世不易不果行成宗崩丞相阿固台奉皇后旨集廷臣議祔廟及攝政事瑋難之阿固台變色曰中丞謂不可行獨不畏死耶衆皆危懼瑋從容曰死畏不義耳苟死於義夫復何畏未幾以疾去位武宗即位于上都授太子副詹事遣使促使就職復遥授平章政事商議中書省事武宗至自上都臨朝問曰孰為何中丞瑋出拜帝曰朕知卿能以忠直為國朕有不逮卿當勉輔至大

元年遷太子詹事兼衛率使俄拜中書左丞仍平章政
事商議中書省事未幾擢河南行省平章政事佩金虎
符提調屯田事帝召至榻前面諭曰汴省事重屯田久
廢卿當為國竭力賜黑貂裘一錦衣二襲瑋至汴建諸
葛亮祠立書院以地三千畝贍之三年改河南行尚書
省平章政事卒贈太傅開封府儀同三司上柱國追封
梁國公諡文正

李守賢

李守賢字才叔大寧義州人也祖小字放軍嘗從金將
攻宋淮南飛石傷髀錄功賞生口七十主將分命將校
殺所掠俘苟有失亡者罪死放軍當殺五百人皆縱之
去金大安初守賢暨兄庭植弟守正守忠從兄伯通伯
溫歸款於太師國王穆呼哩入朝太祖于行在所即命
庭植為龍虎衛上將軍右副元帥崇義軍節度使守賢
授錦州臨海軍節度觀察使弟守忠為都元帥守河東
朝廷以全晉為要害之地人心危疑未定非守賢鎮撫

之不可乃自錦州遷河東南路兵馬都總管既至河東

人皆曰吾等可恃以生矣歲戊子朝于和琳加金紫光

祿大夫知平陽府事兼本路兵馬都總管庚寅太宗南

伐道平陽見田野不治以問守賢對曰民貧窘乏耕具

致然詔給牛萬頭仍徙關中生口墾地河東辛卯平陽

當移粟萬石輸雲中守賢奏以百姓疲敝不任輓載帝

嘉納之時河中未下守賢建言以為將士逗留沮撓多

所傷溺臣請自北面鑿城先登如其言城果下遂構浮

橋明年蒲津南濟潼關二月大破趙雄兵于芮城時方會師圍汴留守賢屯嵩汝金兵十餘萬保少室山太平寨守賢以三千人介其中度其帥完顏延壽無守禦之才癸巳正月望夕延壽擊毬為嬉守賢潛遣輕捷者數十人緣崖蟻附以登殺其守卒遂大縱兵入破之下令禁無抄掠悉收餘衆以歸不兩旬連天交牙蘭若香爐諸寨皆望風俱下守賢未嘗妄殺一人及攻河南其渠魁強元帥者以其衆出奔守賢追及降之秦藍帥王祐

聚衆數萬據虢之南山守賢使人責祐祐素憚守賢威
畧即以所部來附關東洛西遂定甲午冬十月卒年四
十六子穀嗣歲丁酉從太師塔海甘布征蜀漢有功明
年攻碉門又明年征萬州會戰於瞿塘獲戰艦千餘艘
辛丑朝行在所授河東道行軍萬戶兼總管己巳進兵
攻成都由廣元出葭萌度木瓜坡蜀之餘孽團聚為梗
聞穀至潛為伏以侍穀諜知之令衆銜枚疾進出其不
意賊兵敗走長驅至成都破之壬子襲嘉定戊午秋憲

宗南伐己未入梁州師次江上造舟為梁以通援兵且
斷宋人往來之路會江漲梁中絕宋將率舟師萬艘逆
戰穀以一旅先犯之諸軍繼進遂破之明年帝召謂諸
將曰汝輩平日自負鷙勇及臨敵不能為朕立尺寸功
獨李穀身犯矢石摧鋒陷陣視敵蔑如言勇者如穀乃
可耳賜白金二百五十兩中統三年改河東路總管佩
金虎符移京兆路加昭勇大將軍未幾轉洺磁路至元
七年正月卒年四十九子十一人伯溫見忠義傳

耶律阿哈

耶律阿哈遼之故族也金桓州尹實巴爾之孫尚書奏
事官圖卜德勒之子也阿哈天資雄毅勇畧過人尤善
騎射通諸國語金季遣使王汗見太祖姿貌異常因進
言金國不治戎備俗日侈肆亡可立待帝喜曰汝肯臣
我以何為信阿哈對曰願以子弟為質明年復出使與
弟托輝俱往慰勞加厚遂以托輝為質直宿衛阿哈得
參預機謀出入戰陣常在左右歲壬戌王汗復叛盟謀

襲太祖太祖與宗親大臣同休戚者飲布敦河水為盟
阿哈兄弟皆預焉既敗王汗金人訝其使久不還拘其
家屬于瀛阿哈殊不介意攻戰愈厲帝聞之妻以貴臣
之女給戶俾食其賦癸亥冬進攻西夏諸國累有功丙
寅帝建龍旗即大位勅左帥薩巴略地漢南阿哈為先
鋒辛未破烏沙堡鏖戰宣平大捷澮河遂出居庸耀兵
燕北癸酉拔宣德德興乘勝次北口薩巴攻下紫金關
阿哈奏曰好生乃聖人之大德也興創之始願止殺掠

以應天心帝嘉納焉遂分兵畧燕南山東諸郡還駐燕
之近郊金主懼請和諭其使曰阿哈妻子何故拘繫弗
遣即送來歸師還出塞甲戌金人走汴阿哈以功拜太
師行中書省事封托輝為太傅濮國公每宴享必賜坐
命托輝從穆呼哩取中原阿哈從帝攻西域俘其酋長
濟蘭台下布哈塔實干等城留監塔實干專任撫綏之
責未幾以疾薨于位年七十三至元十年追封忠武公
子三人長孟古岱次穆蘇格爾次聶爾科孟古岱太祖

時為御史大夫佩虎符監戰左副元帥官金紫光祿大夫管領契丹漢軍守中都招安水泊等處卒無子聶爾科太祖時佩虎符為右丞行省遼東萬努叛舉家遇害穆蘇格爾襲太師監塔實干城久之請還內郡守中都路伊克達嚕噶齊佩虎符卒子二人邁格通諸國語太祖時為奉御賜濟遜服襲其父中都之職時供億浩繁屢貸于民邁格悉以私帑償之事聞賜銀萬兩戊午從攻蜀師次釣魚山卒于軍妻伊喇氏以哀毀卒特贈貞

靜子七人埒克歷提刑按察使入為中書左丞里瑪備宿衛為筆且齊仕至右衛親軍都指揮使至元二十四年世祖宴于柳林命里瑪居其父位次賜濟遜服二十五年戌哈達圖有戰功以老乞骸骨子六人五台努襲職巴圖爾中書右丞文謙興國路總管布哈早卒蒙古布哈荆湖北道宣慰使呼圖克布哈一名文炳湖州同知萬努為人匠副總管

何實

何實字誠卿其先北京人曾祖搏霄雄於貲好施與鄉里以善人稱祖鼎敬父道忠仕金為北京留守實少孤依叔父居氣節不凡家人常入臥內見一青蛇蜿蜒衣被中駭而視之乃實也及長通諸國譯語驍勇善騎射倜儻不羈遠近之民慕其雄畧咸歸心焉歲乙亥中原盜起錦州張鯨自立為臨海郡王遣使納款于太祖尋以叛伏誅鯨弟致初以叛謀於實實厲聲叱曰天之厯數在朔方汝等恣為不軌徒自斃耳乃籍戶口一萬募

兵三千丙子春來歸大將穆呼哩與論兵事竒變百出拊髀欣躍大加稱賞遂引見太祖獻軍民之數帝大悅賜鞘劍一命從穆呼哩選充前鋒時張致復據錦州實與賊遇於神水縣挺身陷陣殊死戰殺三百餘人獲戰馬兵械甚衆穆呼哩奏賜鞍馬弓矢以勵之以功為帳前軍馬都彈壓詔封穆呼哩太師國王東下齊數郡使實帥師數千取燕南齊西之地首擊邢州徇趙郡取魏鄴下博闕襲曹濮恩德泰安濟寧勢如破竹薄濰州與

穆呼哩會遷兵馬都鎮撫從取大同雁門石隰等州悉
平之引兵掠大原平陽河中京兆諸城所向欵附穆呼
哩錄其功表實為元帥左監軍癸未穆呼哩卒子博囉
嗣武仙復叛據邢實帥師五千圍之立雲梯先士卒登
堞橫稍突之城破武仙走遂北四十里大破之斬首二
百餘級是夜仙黨遁去實下令敢有擅剽掠者斬軍中
肅然士民按堵博囉命戍于邢多著善政邢民敬之如
神明甲申博囉征西夏以實分兵攻汴陳蔡唐鄧許鈞

睢鄭毫潁所至有功計梟首一千五百餘級俘工匠七
百餘人博囉復命駐兵邢州分織匠五百戶置局課織
丁亥賜金虎符便宜行元帥府事邢因武仙之亂歲屢
饑請移匠局于博博囉從之憫其勞瘁使勿出征更檄
東平嚴實與之分治軍民事博值兵火後物貨不通實
以絲數印置會子權行一方民獲貿遷之利庚寅有旨
收諸將金符乙未博囉以實子仲澤為質子丁酉太宗
數召入見實貢金幣紋綺三篚次陵州遇寇實與左右

射之斃二十餘人生獲十餘人朝于幄殿帝歡甚問遇盜之故命所獲寇勿殺仍以賜實是日賜坐與論軍中故事良久曰思卿效力有年朕欲授以征行元帥後當重任實扣頭謝曰小臣披堅執銳從事鋒鏑二十餘年身被十餘槍右臂不能舉已為廢人矣臣不敢辱命願辭監軍之職幸得元佩金符督治工匠歲獻織幣優游以終其身於臣足矣帝默然不悅令射以觀其強弱實不能射命入宿衛密使人覘之實臂不復能舉固辭十

餘始可其奏遂錫宴取金符親賜之授以漢字宣命充御用局人匠達嚕噶齊子孫世其爵更賜白貂帽減鐵繫腰貂衣一襲弓一矢百遣歸丁巳卒于博子九人孫十七人子崇禮授應奉翰林文字從仕郎同知制誥兼國史院編修官

郝哈尚巴圖

郝哈尚巴圖太原人以小字行幼為蒙古兵所掠在郡王竒塔特麾下長通譯語善騎射太祖遣使宋往返數

四以辯稱歲戊子為九原府主帥佩金符庚寅率兵南
伐畧地潼陝有功辛卯授行軍千戶乙未從皇子南伐
至襄陽宋兵二十萬逆戰漢水上領先鋒數百人直前
衝其陣宋兵大潰丙申從都元帥塔哈征蜀下興元宋
將王連以重兵守劍閣乃募敢死士十二人乘夜破關
入蜀諸城悉下明年取夔府抵大江宋兵三十萬軍於
南岸却哈尚巴圖選驍勇九人乘輕舟先登橫馳陣中
既出復入宋兵不能支由是以善戰名庚子歲太宗於

行在所命解衣數其瘡痕二十一嘉其勞進拜宣德西

京太原平陽延安五路萬戶易佩金虎符以兵二萬屬
之復賜馬六騎金錦弓鎧有差甲辰朝定宗於松鄂圖
之行宮賜銀萬錠辭以賞過厚臣不應獨受臣得效微
勞皆將校協力之功遂奏將校劉天祿等十一人皆賜
之金銀符戊申奉詔還治太原請凡遠道租稅監課過
重者悉蠲除之歲饑出白金六十錠粟千石羊數千以
助國用己酉陞萬戶府為河東北路行省得以便宜從

事凡四年壬子三月卒追贈太保儀同三司冀國公諡忠定子十二人長天益佩金符太原路軍民萬戶都總管次仲威襲五路萬戶扎拉布哈鎮蠻都元帥軍民宣慰使天舉大都路總管兼府尹天祐陝西鄂囉萬戶天澤夔州路總管天麟京兆等路諸軍鄂囉萬戶天挺河南江西北行中書省平章政事

趙瑑

趙瑑雲中蔚州人父昆仕金為帥府評事兄珪以萬戶

守飛狐城歲庚午昆卒珪輦其母如蠡州留晉於飛狐
晉自幼不羈閑習武事癸酉太祖南伐先鋒至飛狐城
中不知所為晉詣縣曰大兵壓境不降何待衆從之丁
丑太師國王穆呼哩駐兵桓州署為百戶攻蠡州金兵
閉城拒守國王裨將舒穆魯額森戰死王怒將屠其城
晉泣曰母與兄在城中乞以一身贖一城之命哀懇切
至國王義而許之從攻相州抵其門死士突出晉直前
擊之流矢中鼻側鏃出腦後拔矢再戰七日破其城論

功授冀州行軍都元帥佩金虎符璿讓其兄珪朝廷從之改授璿軍民總督稍遷易州達魯噶齊佩金符太宗下河南璿自易州馳驛輸矢二十餘萬至行在帝大喜命權中都省事癸巳趙揚據興州叛璿進軍平之遷中山真定二路達魯噶齊中統元年詔立十道宣慰司以璿為順天宣慰使至元元年轉淄萊路總管六年改太原路總管十二年陞燕南道提刑按察使十四年遷河南道十六年致仕明年卒年八十皇慶元年贈儀同三

司太保上柱國追封定國公謚襄穆子秉溫

秉溫事世祖潛邸命受學於太保劉秉忠從征吐蕃雲南大理中統初詔行右三部事至元七年創習朝儀閱試稱旨授尚書禮部侍郎知侍儀司事明年授秘書少監購求天下秘書十九年遷昭文館大學士知太史院侍儀司事授時歷成賜鈔二百錠進階中奉大夫二十九年編國朝集禮成帝特命其子慧襲侍儀使皇慶元年贈金紫光祿大夫司徒雲國公謚文昭子慧後仕至

昭文館大學士

舒穆魯明安

舒穆魯明安桓州人性寬厚不拘小節童子時嘗騎杖
為馬命羣兒前導行列整肅無敢喧譁者父老見而異
之曰是兒體貌不凡進退有度他日必貴既長歎曰士
生于世當立功名書竹帛以傳無窮寧肯碌碌無聞與
草木同腐邪歲壬申太祖率師攻破金之撫州將遂南
向金主命招討赫舍哩糾堅來援時明安在其麾下糾

堅謂之曰汝嘗使北方素識蒙古國主其往臨戰問以
舉兵之由不然即詔之明安初如所教俄策馬來降帝
命縛以俟戰畢問之既敗金兵召明安詰之曰爾何以
詈我而後降也對曰臣素有歸志向為糾堅所使恐其
見疑故如所言不爾何由瞻奉天顏帝善其言釋之命
領蒙古軍撫定雲中東西兩路既而帝欲休兵於北明
安諫曰金有天下一十七路今我所得惟雲中東西兩
路而已若置不問待彼成謀併力而來則難敵矣且山

前民庶久不知兵今以重兵臨之傳檄可定兵貴神速
豈宜猶豫帝從之即命明安引兵南進所至民皆具簞
食壺漿以迎盡有河北諸郡而還帝復命明安及僧格
巴圖將兵由古北口徇景薊檀順諸州諸將議欲屠之
明安奏曰此輩當死今若生之則彼之未附者皆聞風
而自至矣帝從之乙亥春正月取通州金右副元師富
察齊錦以其衆降明安命復其職置之麾下遂駐軍于
京南建春宮金御史中丞李英元帥左都監烏庫哩慶

壽領兵護軍食以援中都帝遣副元帥實沙將四百騎
迎戰明安將五百騎繼之遇于永清將戰命士卒佯作
敗金兵來追迴擊大破之死及溺水者甚衆獲李英及
所佩虎符得糧千餘車遂招諭永清不降拔而屠之未
幾金將完顏和卓監軍阿星宗噶爾復以步兵萬二千
糧車五百輛援中都明安復將三千騎往擊之遇于涿
州宣封寨獲宗噶爾和卓遁去盡得輜重還屯建春宮
四月攻萬寧宮克之取富昌豐宜二關攻拔固安縣初

順州之破兵士縛密雲主簿完顏壽孫以獻明安釋而
用之不久逸去復來問其故對曰有老父在城中恐不
能存謀歸欲得侍養今已歿故復來明安義而釋之五
月明安將攻中都金相完顏復興飲藥死辛酉城中官
屬父老縉素開門請降明安諭之曰負固不服以至此
極非汝等罪守者之責也悉令安業仍以粟賑之衆皆
感悅明安早從軍旅料敵制勝算無遺策雖祁寒盛暑
未嘗不與士卒均勞逸同甘苦其得金府庫珠玉錦綺

明安悉具其數上進未嘗以纖毫為已有中都既下加
太傅邵國公兼管蒙古漢軍兵馬都元帥丙子以疾卒
于燕城年五十三子二人長軒達布襲職為燕京行省
次呼圖克華太宗時為金紫光祿大夫燕京等處行尚
書省事兼蒙古軍兵馬都元帥

張榮

張榮字世輝濟南歷城人狀貌竒偉嘗從軍為流矢貫
背拔之不出令人以足抵其額而拔之神色自若金季

山東羣盜蜂起榮率鄉民據濟南蠶堂嶺衆稍盛遂畧
章邱鄒平濟陽長山辛市蒲臺新城及淄州之地而有
之兵至則清野入山歲丙戌東平順天皆內屬榮遂舉
其兵與地納款於阿齊台諾延引見太祖問以孤軍數
年獨抗王師之故對曰山東地廣人稠悉為帝有臣若
但有倚恃亦不款服太祖壯之拊其背曰真賽音巴圖
爾也授金紫光祿大夫山東行尚書省兼兵馬都元帥
知濟南府事時貿易用銀民爭發墓劫取榮下令禁絕

庚寅朝廷集諸侯議取汴榮請先六軍以清蹕道帝嘉之賜衣三襲詔位諸侯上辛卯軍至河上榮率死士宵濟守者潰詰旦敵兵整陣至榮馳之望風披靡奪戰船五十艘麾抵北岸濟師衆軍繼進乘勝破張盤二山寨俘獲萬餘大將額斯倫恐生變欲盡殺之榮力爭而止癸巳汴梁下從額斯倫為先鋒攻睢陽議欲殺俘虜烹其油以灌城又力止之既而城下榮單騎入城撫其民甲午攻沛沛拒守稍嚴其將蘇克夜來擣營榮覺之蘇

克返走率將士追殺之乘勝急攻城破就攻徐州守將
國用安引兵突出榮逆擊之亦破其城用安赴水死乙
未拔邳州丙申從諸王奎騰破宋棗陽仇城等三縣時
河南民北徙至濟南榮下令民間分屋與地居之俾得
樹畜且課其殿最曠野闢為樂土是歲中書攷績為天
下第一李瓊據益都私餽以馬蹄金榮曰身既許國何
可擅交鄰境却之年六十一乞致仕後十九年世祖即
位封濟南公致仕卒年八十三子七人長邦傑襲爵先

卒邦直行軍萬戶邦彥權濟南行省邦允知淄州邦孚
大都督府郎中邦昌鄂囉總管邦憲淮安路總管孫四
十人宏襲邦傑爵改真定路總管

劉亨安

劉亨安其先范陽人後遷遼東川州初國王穆呼哩經
畧遼東兄世英率宗族鄉人隸麾下分兵收燕趙雲朔
河東以功充行軍副總管庚辰平陽諸郡被兵之餘民
物空竭世英言於王曰自古建國以民為本今河東殺

掠殆盡異日我師復來孰給轉輸收存恤亡此其時也
王善之以絳州邊地難其人奏授世英絳州節度使兼
行帥府事卒于師無子國王博囉命其族兄德仁襲職
丙戌歲金將伊喇副樞攻絳州城陷死之穆呼哩承制
命亨安領其衆奏賜金虎符授鎮國上將軍絳州節度
使行元帥府事兼觀察使庚寅冬從王師渡河入關辛
卯春克鳳翔歷秦隴屯渭陽秋出階城泂漢抵鄧壬辰
會大軍於鈞州敗金人於三峰山甲午平蔡既而宋兵

二十萬攻汴將趨洛都元帥塔齊爾俾亨安往拒之與
宋軍遇龍門北遂橫槊躍奮衝突而前衆因乘之宋師
奔潰追擊百餘里塔齊爾拊其背曰真驍將也延坐諸
將之右勞賜甚厚丙申都元帥塔哈征巴蜀攻散關破
劍門出奇制勝戰功居多進圍成都亨安為先鋒大破
之於城西生擒宋將陳侍郎有喬長官與亨安爭功未
幾攻城喬為砲所傷亨安負之以出喬感愧亨安從軍
十年累著勲伐所獲金帛悉推與將佐故士卒咸樂為

用癸卯冬十二月卒子貞嗣職孫三人弘彊孳

元史卷一百五十